

Tiäđuh Kanta-palvâlusâin sosiaal- já tiervâsvuodâhuolâttâsâst ášástâlleid

Sosiaal- já tiervâsvuodâhuolâttâs áámmátulmuuh pyehtih faallâđ tunjin pyeremuu máhđulâš palvâlus, ko sist láá kiävtust äigikyevdilis tiäđuh meiddei tast, maggaar palvâlusâid tun lah uázžum ovdil. Taan suujâst reesept-, pyeccee- já äššigâstiättud vyerkkejuvvojuh Kanta-palvâlussâid.

Kanta-palvâlusâi vievâst tuu tiäđuh kiedâvuššojeh torvolávt

Kanta-palvâlusah láá riijkâvijđosâš tiätuvuáhádâhpalvâlusâi ubâlâšvuotâ. Ko tun ášástâlah sosiaal- já tiervâsvuodâhuolâttâsâst teikkâ apteekist, tuu äššigâs- já pyecceetiäđuh vyerkkejuvvojuh palvâlusadeleijee tiätuvuáhádâhân. Tobbeen toh sirdâšuveh Kanta-palvâlussâid.

Kanta-palvâlusâi išseen tuu tiäđuid pyehtih sirded tiätutorvolávt áámmátulmui kiävtun kiäh hoittájuh tuu aasijd. Tun puávtáh jieš kejjâstállâđ tiäđuidâd MuuKantast.

Návt tiätu jotá Kantast

- Äššigâs- já pyecceetiäđuh láá Kantast.
- Sosiaal- já tiervâsvuodâhuolâttâs áámmátolmooš kirjeet já kiäččá tiäđuid jieijâs tiätuvuáhâduvvâst.
- Áámmátulmuu kevttim vuáhâduvvâst tiäđuh maneh Kantan.
- MuuKantast aalmugjeessân puáhtá keččâđ já haldâšid jieijâs tiäđuid.

Tuu tiäđui kevttim vuáđuduvá ain äššigâs- teikkâ tipšomkoskâvuotân

Sosiaal- já tiervâsvuodâhuolättâs áammátulmuuh aneh ävkkín tiäduidâd tuše talle, ko tot lii taarbâšlâš. Tiäđui kevttim váátá ain äššigâs- teikkâ tipšomkoskâvuodâ sehe pargoid vuáđuduvvee kevttimvuoigâdvuodâ. Tiäđui keččâmist páácá merkkim tiäđoid, vâi tai kevttim puáhtá kocceed.

Ko tun adelah luovâtemlove, te eres palvâlusadeleijeeh pyehtih kevttih tuu tiäđuid

Sosiaal- já tiervâsvuodâhuolättâs palvâlusadeleijeeh pyehtih keččâđ tiäđuidâd jieijâs pyeccee- teikkâ äššigâsregisterist tuu sierâ lovettáá. Ovdâmerkkân pyereestvaijeemkuávlust vyerkkejum pyecceetiäđuh láá kevttimnáál koččâmušâst leijee pyereestvaijeemkuávlust tiervâsvuodâhuolättâsâst.

Tuu reesepttiäđuid pyehtih kevttiđ tuu sierâ lovettáá tipšomtiileest já ko tun viežah talkkâs apteekist.

Ko adelah luovâtemlove, te tuu tiäđuh láá meid eres palvâlusadeleijei kiävtust tobbeen, kost tun ášâstâlah. Taat táárgut, ete tuu tiäđuid pyehtih luovâttiđ ovdâmerkkân pyereestvaijeemkuávlust kooskâst sehe almolâš já priivaat tiervâsvuodâhuolättâs kooskâst.

Luovâtemlope uudâsm

31.12.2023 räi luovâtemlope lii toohâm máhđulâžžân Kanta-palvâlussáid vyerkkejum tiäđui luovâtem.

Joodhâst luovâtemluuvijn pyehtih luovâttiđ meiddei taggaar tiäđuid, moh iä lah Kantast.

Tánávt ovdâmerkkân meiddei tuu pápárân kirjejum tiäđuid uázžu luovâttiđ pyereestvaijeemkuávlust nuubán teikkâ almolâš já priivaat tiervâsvuodâhuolättâs kooskâst.

Jis tun lah adelâm luovâtemlove ive 2023 teikkâ ovdeláá, te tom kannat peividiđ MuuKantast. Návt tuu luovâtemlope taha máhđulâžžân joodhâst tai-uv tiäđui luovâtem, moh iä lah Kantast.

Jis tun adelah luovâtemlove vuosmuš tove, tot taha máhđulâžžân tuu Kantast leijee sehe eres tiäđui luovâtem.

Jis tun jieh peivid luovâtemloováád, te lope piso vyeimist já taha máhđulâžžân joodhâst-uv tuu Kantan vyerkkejum tiäđuid luovâtem.

Lasetiäđuid luovâtemlove uđâsmitmist tun kaavnah čujottâsâst kanta.fi - **Pyecceetiäđui luovâtemlope** (suomâkielân)

Tun puávtáh vaiguttiđ tiäđuiddâđ kevttimân raijiimáin tai luovâtem

Luovâtemkiäldoin tun puávtáh miäruštállâđ, ete maid reesept-, pyeccee- já äššigâstiäđuiddâđ ij uážu luovâttiđ eres sosiaal- já tiervâsvuodâhuolâttâs palvâlusadeleijeid keččâmnáál.

Jis tun kiäldáh mottoom pyeccee- já äššigâstiäđuiddâđ luovâtem, toh uáinojeh tuše tom palvâlusadeleijei, kiän registerân tiäđuh kuleh. Tuu tiäđuh uáinojeh kiälduin huolâhánnáá ovdâmerkkân ton pyereestvaijeemkuávlust, kost tiäđuh láá kirjejum.

Tun puávtáh adelid̄ teikkâ peividiđ luovâtemlove já toohâđ luovâtemkiäldu MuuKantast. Tun puávtáh hoittâđ lope- já kiöldimaasijd meid, ko tun áššâstâlah tiervâsvuodâhuolâttâsâst.

Tiervâsvuodâtiäđui kevttim Uusimaa-kuávlust

Uusimaa eennâmkode kuávlust almolâš tiervâsvuodâhuolâttâs palvâlusadeleijeeh uázžuh keččâđ nubijdis registerijn orroo pyecceetiäđuiddust, ko tun lah uázžum Kanta-informistem ađai almottâs tuu tiäđui kevttimist.

Sosiaal- já tiervâsvuodâhuolâttâs puáhtá kevttiđ taan tiedettemkirjáá iššeen ko addel tiäđu tunjin. Muulsâiähtulávt tun puávtáh luuhâđ já kuittiđ almottâs jieš MuuKantast.

Luovâtemluuvijn tun puávtáh raijid̄ pyecceetiäđuiddâđ kevttim meiddei Uusimaa kuávlust.

Lasetiäđuiddust tiäđui kevttimist tun kaavnah čujottâsâst kanta.fi - Luovâtemlove já kiälduh (suomâkielân)

Ášástállâm MuuKantast já apteekist

Mii lii MuuKanta?

MuuKanta lii nettipalvâlus, mon peht tun peesah uáinid Kanta-palvâlussáid vyerkkejum tiäduidâd. MuuKantast tun uáináh jieijâd tiervâsvuotâtiäđuid já reseptijd, puávtáh táttuđ reesept uđâdem sehe vuorkkiđ orgaanluovâtem- já tipšomtáatu. Sosiaalpalvâlusâi tiäđuuh puátih uáinusân MuuKantan eres ääigi eres kuávluin Suomâst.

MuuKantan čáládâttoo siisâ ovdâmerkkân paŋkkitubdâlduvâiguin čujottâsâst kanta.fi.

MuuKantast lii máhđulâš ášástállâđ nube rävisulmuu peeleešt šleđgâlâš Suomi.fi-váldásmitmáin. Meiddei huolâtteijeeh pyehtih ášástállâđ párnáá peeleešt MuuKantast.

MuuKantast lii finnimnáál eenâb tiätu. Tun puávtáh táttuđ tiedettemkirjâá ášástâldijnâd sosial- teikkâ tiervâsvuodâhuolâttâsâst.

Talkkâs uástim reseptáin

Puoh resepteh meriduvvojeuh šleđgâhâámist já tiäđuuh vyerkkejuvvojeuh Kanta-palvâlussáid.

Vuástávâldimist tun uázuh mielâ printtejum pyecceeravvuuh, mast tun uáináh talkkâsij noomâid já vâldimravvuid. Tun uáináh taid tiäđuuid meiddei MuuKantast. Tun finniih talkkâsijd apteekist čäittimáin ovdâmerkkân tuu Kela-koortâ teikkâ pyecceeravvuuh.

Jis kiinii eres viäžžá tuu peeleešt tuu talkkâsijd apteekist, sust ferttee leđe mielâ tuu Kela-korttâ teikkâ tuu pyecceeravvuuh. Tun puávtáh meiddei adelid talkkâs viežžei šleđgâhâmásâš apteekâšástállâmváldásmittem Suomi.fi-nettipalvâlusâst.

Luvvâ eenâb:

kanta.fi (suomâkielân)

kanta.fi - Tiäđui kevttim já torvolâšvuotâ (suomâkielân)

Almostittum 2/2024